

Te hasta su Mahestad La Reina a ser confronta cu contaminacion:

Caso avion cu a cay na Bijlmeer a resulta den escandalo pa Gobierno Hulandes

ORANJESTAD(AAN) Con grandi y lihe e mentira por ta, tardi o tempran e berdad lo alcansa esaki ta loke a pasa tambe cu e caso di e desgracia tragico di e avion di El Al di Israel cu a cay na 1992 na Bijlmeer na Amsterdam matando por lo menos 43 persona.

Hopi hende a perde nan bida na un forma tragico ora cu un avion di carga tipo Boeing 747 - 200 di Israel a bora su nies den un flat caminda cu hende tabata biba y hopi hende a keda mal herida fisicamente y tambe mentalmente.

Despues di e tragedia di Bijlmeer hopi hende tabata keha di malesanan straño y pa añanan largo tur sorto di instancia di gobierno Hulandes cu tabata encarga cu investigacion riba e desgracia, a tapa cu den e avion tabata tin carga di material peligroso pa salud di e ser humano y tambe

dañino pa e medio ambiente.

Victimanan cu a sobreviví e tragedia y famianan cu a keda perhudica a lucha duro y a haya nan mes ta bay di un instancia pa otro y nan tabata worde balia tras di otro, pa asina gobierno hinca henter e caso den e famoso Doofpôt Hulandes.

Recientemente investigacionnan a bin saca afor cu den e avion tabata tin material pa traha gas e gas sumamente peligroso y mortal yama Sarin y tambe otro materialnan cu aparentemente tabata nuclear y venenoso pa e ser humano y e materialnan aki a plama durante e impacto den e flatnan na Bijlmeer.

Material valioso y comprometedor pa cu e investigacion riba loke a pasa cu e desgracia a ser teni tapa y un tape di e toren di control den cual tabata tin graba cu un fun-

cionario di e compania di aviacion Israeli a yama toren di aeropuerto pa bisa cu tabata tin material toxico den e avion a ser teni scondi.

Personal di bombero, polis, ambulans y otro personal di rescate y tur hende cu a yega cerca di e lugar di desgracia a ser contamina cu material toxico sin cu un dia gobierno Hulandes a haci algo pa adverti tur hende y tambe actua pa laga tur hende ser examina y trata pa e consecuencianan.

E avion di El Al tabata yena cu municion tambe y esaki aparentemente tambe por a causa mas morto cu normalmente por tabata e caso cu un desgracia di tal magnitud.

E tape secreto cu awor a sali na claridad di dia tabata scondi den un caha fuerte na aeropuerto di Schiphol y e noticia aki a lanta

rabia cerca pueblo Hulandes cu ta sinti su mes defrauda y traiciona pasobra ta cu bida di hende esnan cu a trata di tapa e escandalo a hunga.

Un di e puntonan mas escandaloso tabata cu gobierno Hulandes a permiti pa su Mahestad La Reina a bishita e lugar di desgracia y di cerca mira kico a pasa.

E tempo ey tur hende por a corda con su Mahestad La Reina Beatrix tabata yora ora cu el a wak kico a pasa na Bijlmeer y e tabata sinti pa tur esnan cu a ser perhudica den e

sentido amplio di e palabra.

Con un gobierno por permiti pa su pueblo y te hasta su hefe di estado, esta La Reina worde exponi na materialnan toxico y peligroso sin avisa hende y sin tuma medidanan despues?

Despues di e caso IRT, Cargo Zaak y Orion Gate e escandalo aki ta bolbe pone gobierno Hulandes pasa den un berguensa internacional di politica di tapamento y konkelmento gubernamental.

Jo Anna Maduro Reina Escolar a bira

Reina Juvenil di Carnaval



ORANJESTAD(AAN): Nos escolarnan cu nan Reina Escolar, a ripiti cu reina juvenil ayera anochi ora cu Jo Ann Maduro a wordo eligi como reina juvenil di carnaval di Aruba.

E resultado tabata conoci 10 pa 12 ayera anochi despues di un eleccion sumamente bunita y cu a wordo transmiti via Tele Aruba cu a haya hopi elogio pa e transmision aki. Den e shownan cu tabata tin e premio pa Best Costume a bay pa reina di Aruba tivoli Club, Zuleika Harms cu alavez a bira di dos finalista, mientras cu prome finalista tabata Jo Ann Dirksz di Colegio Arubano. Di tres finalista a resulta den persona di Ayrine Marugg di Pos Chiquito y di cuatro finalista Jersey Ras di Dream Team.

Mester duna un elogio tambe na Comision Juvenil di Carnaval pa e anochi aki cu a cuminsa na ora y cu a logra termine tambe prome cu 12 or anochi cu tabata e limite. E "timing" di presentacion di candidatanan ayera anochi tabata riba e minuut tambe, locual a pone cu e publico por a goza di un show tras di otro y cu cada candidata cu mes cantidad di tempo pa nan presentacion.

Ta solamente cu candidata Mary Ann Kock di San Nicolas tabata tin un tardanza debi na problema di trece su piezanan paden cu forklifter, y e decision tuma pa laga e candidata presenta su show completo sin cu mester a kita punto a cay na agrado di tur hende, ya cu e falta no tabata di dje ni di su ayudantenan.

Juez ta hay'e complice di a falsifica carta

Boet di 1500 Florin pa Glenbert Croes



ORANJESTAD(AAN) -- Un multitud di hende tabata ayera den edificio di Corte pa apoya lider di OLA, Glenbert Croes, promer cu e scucha su sentencia. Den tribuna di sala di Corte, no tabatin lugar pa pone mas hende.

Juez a bisa cu e ta rechaza e defensa di mr. Oomen kende a pidi pa declara Ministerio Publico no admisibel den e caso contra Glenbert Croes. Juez a splica cu el a rechaza esaki pasobra e no ta haya cu Ministerio Publico a traha incorrecto den e caso aki.

Pa loke ta trata e acusacion contra Glenbert Croes, esta cu e ta complice di falsificacion di un carta, Juez ta haya

cu a keda legalmente proba cu Glenbert ta culpabel.

Juez su decision ta cu Glenbert Croes mester paga un boet di 1500 florin y si e no paga e mester bay cera 30 dia den KIA.

E decision di Juez ta basicamente confirma e exigencia di Fiscal kende a existi 1500 florin di boet y si Glenbert no paga e mester bay cera.

Por a mira claramente cu Glenbert Croes y su abogado mr. Oomen no tabata contento cu e sentencia.

Pafor di edificio di Corte Glenbert Croes a declara cu e ta apela e caso.

Ki consecuencia e decision

di Juez tin pa su carera politico no ta conoci. DIARIO a papia cu Fiscal mr. van Ginkel, kende a splica cu e no por bisa kico ta bay sosode. For di e splicacion cu el a duna, por comprende cu ta Promer Minister Eman lo mester dicidi kico lo bay pasa awor cu Glenbert Croes. E pregunta cardinal ta si awor cu e sentencia ta conoci, Glenbert Croes lo por sigui den su funcion como Parlamentario of e por bay ocupa e puesto di Minister.

Door cu Glenbert Croes a bisa cu e ta apela e caso, lo mester warda decision di Corte Superior, promer cu lo por haya sa kico lo bay pasa.